

四庫全書

集部

欽定四庫全書

集部

雞肋集

總目
卷一至三

詳校官庶吉士臣初喬齡

侍讀臣孫球覆勘

覆校官主事臣李駿

校對官中書臣王鍾泰

臚錄舉人臣劉禮

欽定四庫全書

集部三

雞肋集總目

別集類二宋

卷一

古賦

卷二

古賦

卷三

辭

卷四

古詩

卷五

古詩

卷六

古詩

卷七

古詩

卷八

古詩

卷九

古詩

卷十

古詩

卷十一

古詩

卷十二

古詩

卷十三

古詩

卷十四

古詩

卷十五

律詩

卷十六

律詩

卷十七

律詩

卷十八

律詩

卷十九

絕句

卷二十

絕句

卷二十一

絕句

卷二十二

絕句

卷二十三

挽辭

卷二十四

上書

卷二十五

罪言

卷二十六

河議

卷二十七

雜著

卷二十八

雜著

卷二十九

記

卷三十

記

卷三十一

記

卷三十二

銘贊

卷三十三

題跋

卷三十四

序

卷三十五

序

卷三十六

離騷序

卷三十七

策問

卷三十八

策問

卷三十九

策問

卷四十

春秋雜論

卷四十一

春秋雜論

卷四十二

西漢雜論

卷四十三

西漢雜論

卷四十四

西漢雜論

卷四十五

唐舊書雜論

卷四十六

唐舊書雜論

卷四十七

唐舊書雜論

卷四十八

唐舊書雜論

卷四十九

唐舊書雜論

卷五十

五代雜論

卷五十一

書

卷五十二

書

卷五十三

奏狀

卷五十四

表

卷五十五

表

卷五十六

啓

卷五十七

啓

卷五十八

啓

卷五十九

啓

卷六十

祭文

卷六十一

祭文

卷六十二

傳行狀

卷六十三

墓表

卷六十四

墓誌銘

卷六十五

墓誌銘

卷六十六

墓誌銘

卷六十七

墓誌銘

卷六十八

墓誌銘

卷六十九

釋氏贊疏

卷七十

釋氏贊疏

臣等謹案雞肋集七十卷宋晁補之撰補之

字无咎鉅野人元豐間進士元祐中除校書

郎紹聖初落職監信州酒稅大觀中知泗州
卒於官初蘇軾通判杭州補之隨父端友官
於杭軾見所作七述大嘆賞之由是知名與
黃庭堅張耒秦觀為蘇門四學士耒嘗言補
之自少為文即能追考屈宋班揚下逮韓柳
之作促駕力鞭務與之齊而後已晚歲自訂
所作名雞肋集宣和以前避蜀黨秘不傳紹
興中其從弟謙之始編次為七十卷刊於建

陽云乾隆四十一年五月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

雞肋集原序

雞肋集左朝奉郎秘書省著作郎充秘閣校理國史編
脩官濟北晁補之无咎自名其所為詩文也夫物有質
者必有文文者質之所以辨也古之立言者當之平居
論說諷諭應物接事不能無言非虎豹犬羊之異也雞
之則無所得棄之則可惜其雞肋乎故裒而藏之謂之雞
肋集元祐九年二月旦日序

欽定四庫全書

雞肋集卷一目錄

古賦

求志賦

釋求志附

夢覲賦

坐愁賦

坐進庵賦

雞肋集卷一 目錄

欽定四庫全書

雞肋集卷一

宋 晁補之 撰

古賦四首

求志賦

釋求志附

幼余不自知，蠢兮願求古人而與之游。高平邑於大野，
分魯東鄙而北鄒固。余心其惻款兮，求前聖又不遠。豈
無鄰莫可與謀兮，治邴氏而俗泮。幽離房誠不忍兮，棄
此而莫能歲執。徐之青陽兮，余先子乎東征。橫武林之

大江兮睢始寧之南邑路會稽以周流兮求歷山之所
在管封嶠之世守兮以後夫而致刑越懲耻於夫椒兮
進樵女而抑心懿二臣以國霸兮卒焉異夫出處行束
薪而自言兮妻不忍而求去助申威於司馬兮卒隕聲
以淮南盱訴死於婆婆兮悲綽約之亦殲彼章陳之詭
嘯兮既睟眙於甲夜何仲御之清激兮而亦云駭夫觀
者紛回穴其莫識兮泮千載而迹陳思苗山猶若茲兮
又何悲乎曲水惟鄭公之志約兮逢神人焉靡求山岵

肆而谷紆兮風瀏瀏乎旦暮耿吾何不可留此土兮竊
悲越人之機豈其食鮭而化音兮無所用吾之縷冬矇
矇其多雨兮夏暉熱以生蠶溪水之淺深兮舟上下而
擊石吾遵夏蓋之山兮聊以觀乎遠海吾先子之初服
兮羌董道而不改小人之有心兮猶不假器末余從於
東安兮依哲人而聞誼蜀蘇子之有屢兮漢遺化而多
儒往者其不可及兮曷不從子之廬朝余食乎山中夕
余宿乎江上悲世俗之近市兮余安能忍而與之皆往

余令樓季為右兮使王陽前余世解轡而馳石兮緬余
得此坦塗良吾輶使環滸兮密吾牙使樸屬攬九州而
顧懷兮夫安知余力之不足邁余生之罹閔兮歸將母
乎故都伏里門而畏鄰兮幽獨守此四隅時命大謬兮
吾廷廷欲何之慨永夏之宜養兮霜夢然其萃之增歔
歔以啜泣兮殺身其安可宇摧榮而藩穴兮雀鼠去而
不舍惜四序之不淹兮春藹藹其既非攬卉木猶若茲
兮吾獨不聊此時悲予仲之婉孌兮饒其心以詩禮吾

不能操贏而坐閭兮耘東山而自食歲旱曠而不雨兮
螟又生余之場屬歲秋之有穀兮河出墳而湯湯於陵
子之終褊兮井上李其猶飽服芬芳而潔腹兮夫豈不
足以忘老衆虎豕而好朝兮咸得時而的皪持衣裘而
鬻暑兮余固知余賈之不售思遐舉而莫從兮心紆軫
而盡傷訊黃石以吉凶兮基十二而星羅曰由小基大
兮何有顛沛既非初志之敢期兮曾何以知其所繫類
清濟以去垢兮芝九莖而為華宵倚楹而悲說兮疇獨

憂余之無家蕭苑候之慷慨兮孰云非食之故濟澶淵
之靈津兮橫中流而颺怒思城關之挑達兮勉踵夫簪
之人羿之志於穀兮亦反求夫余身小人不知學禮兮
畏罪罟之所尋宋七世之炳靈兮皇純佑此下土舉賢
而授能兮哀熒獨此黎庶牧羊而肥兮式亦用夫有聞
辟雍之洋洋兮宇干日而糾紛連衽以成雲兮汗而為
雨豈余不足於同門兮獨惆悵而延佇先事而後得兮
惟其食者之責舉九鼎於鯢淵兮亦人假夫一臂余張

子之好脩兮蹇博大而無朋雪霏霏而宇凍兮松柏不改其青固黃子嘗語余兮曰此是為明月雖工師不以佩兮保厥美亦未艾彼喔咿為已甚兮羌浮石而沈木子雲之好思兮亦衆諄其寂寞虞氏之為政兮舉五臣而與言彼霖霖之射谷兮何足以容江潭之鱸衆不察余之情兮求余初猶未沫超孤舉而遠尋兮唯夫不足而論世良恫韓而成漢兮皓保惠而悟高成功則去兮曾何足以介其一毛融躬行既卒驕兮禹服義亦太靡

陳輜車與藥馬兮桓榮亦首乎富貴蕃居室其不理兮
滂之志以四海允膺之激烈兮羌不以生而昧義意豈
弟神所嘏兮固何以罹此之不祥豈其莫忍鄰之梓兮
紛救鬪而得傷嘉林宗之善裁兮要成敗以不失寧遵
不知時之可為兮行漁瀨以畢世喟嵇康之蹈盡兮愧
孫子其安補阮清舌而咎目兮潛固自識而遠去謂道
不可為兮為者敗之衆竄然咸不留兮惟至人焉在之
泮千祀而語鄰兮孰與至人之服意神龍之藥雲兮吾

欲從焉以足士生各有遇兮吾何為佗僚乎此時曾藿
菽不足以化兮求余身其庶幾滋蘭以旨蓄兮菊以為
糗修忠信以抑躁兮夫安知余時之後圖前聖吾永賴
兮攬百子與竝興時翱翔於道與兮歷年歲以為娛

釋求志

求志自叙也予從先人寓鉅野又從先人仕會稽又從
先人仕杭余仕於澶仕於魏而後仕於太學故求志所
叙如此高平邑於大野謂高平鉅野縣也魯人好文學

而獨邴氏以治富魯人所以去文學趨利者以邴氏故也是見地理志貨殖傳離房別房也揚雄云芳酷烈而不聞兮不如襞而幽之離房武林餘杭也始寧上虞也歷山舜所耕也封嵎防封氏禹執而戮之者也夫椒吳所棲勾踐之山而西施蓋樵家女二臣大夫種范蠡信威司馬者嚴助也曹娥父名盱章陳云者章丹陳珠二女巫夜祠詭嘯夏統見而驚走者也而仲御亦嘗見賈充叩舷吳歌致風雲予怪之仲御夏統字也苗山即會

稽山曲水永和諸君所集處鄭宏遇神人於若耶溪云
願旦南風算北風夏蓋上虞海旁山名自此以上上虞
事東安杭州新城也予始見睂山蘇公於杭故云末予
從於東安兮依哲人而聞誼樓季古善御者王陽不馳
九折坂者也予自謂至此乃知學之所趨猶出荊棘險
阻得大塗而思驚也環瀟樸屬考工治車說車君子之
器車工而後可以致遠君子修而後可以涉世自此以
上新城事將母故都予喪先人歸濟時也予仲無數也

東山濟東郭子所田處比二年不雨河決卒不穫於陵
子於陵仲子也虎豕猶參差見甘泉賦趣市者平旦側
肩爭門而入日暮之後掉臂而不顧故云衆虎豕而好
朝謂干時者也世所用卜靈樞者曰是為黃石書始予
免喪占之繇曰由小至大無有顛沛予自謂非予志所
期也類清濟而以芝為華以况余不敢汙以干時倚楹
魯漆室女中宵悲嘯鄰人疑其欲嫁者也蕭望之嘗為
小苑東門候自謂各從其志予暮之澶淵予為掾時事

挑達予教授北京時事予去北京為太學正故曰辟雍之洋洋鯢桓九淵名舉鼎九淵非一臂力然一臂亦有助也張子予太學同舍文潛也文潛不苟合於人黃魯直為明月篇遺之曰天地具美兮生此明月陞白虹兮貫朝日予愛之浮石沈木無是道也而誣善者其言嘗類此大才而小使之譬霖霖非鱸所游也求斯世而莫予知也則思古人焉孟子所謂是以論其世也故曰惟夫不足而論世自恫韓成漢至潛固自識而遠去皆論

世之事也馬融張禹驕靡桓榮以車馬夸弟子皆不足
言陳蕃范滂王允李膺李固以忠殺身亦可傷矣夫惟
無心於為者為能為天下張良四皓所以成也知其不
可而不為則若林宗淵明可矣有光武而嚴陵去之非
也遵陵也阮籍在晉人中頗能自濁口不臧否人物而
為青白眼殆矣故曰阮清舌而咎目也餘子傖穰小人
之中如捧土救河潰卒與之俱溺豈不痛乎故曰為者
敗之懲數子之為而敗而不知時之可為又蔽矣而予

又不足為也故終欲求之予身

夢覲賦

歲闋逢之泥灘兮前日至而匪思夢啾耳之薨薨兮翁
青蠅其壯楮咸南徙而未逝兮遺其矢如散絲余俛避
而不汙兮一媪背之淋漓脰不知其可穢兮偶竝趨於
西帷媪左目之穴枯兮并四五其萃之旁兩媪之無言
兮亦依帷而靡期朝怛寤而自診兮營營發詩而可知
蹇俱翔而遺矢兮技止此其奚為惟一盲而兩默兮與

目蒨為何機豈眇視不足與明兮蒨非寄而終離羌何
為而朕此兮神無心而罔私拜受神祥兮編之冊詞文
女三之為姦兮比匪人而惡之微夫周公之為見兮迂
若此其余衰欲徼福則安敢兮問故老其增疑苟不污
為已免兮謝三媼之難知

坐愁賦

魯人間子仲武行年七十四躬耕於鄙歲旱不入而色
藜藿促鼓其琴作坐愁之聲嘗所與游晁子補之恐其

傷也為作坐愁賦假翁與過者語以解之其詞曰

彼何人而處廓兮匪三閤而獨醒鬢毛穆其雪糝兮眸
子瞭其星明塊獨守此中野兮困無禾而爨清拂素琴
之浮埃理坐愁之遺聲忽推几而睨天送飛鴻之杳冥
或過其前曰有心哉然何求簪林類之行歌云既老而
無憂翁年運而德加翁何為乎坐愁翁偶顧而若聞猶
援琴而不捨曰子非魯之儒服者耶何以不知漆室女
者晝輟紆而淫思宵倚楹而悲吟彼淺哉其量人匪魯

憂而欲嫁豈不誤耶吾亦傷夫魯之君子簪在厄而不
糝賜自殖而何誅顧棄軒而中紺羌同道而耻茲廼長
饑乎回憲彼林類其何人雖信賢而獨善或者曰未既
也請言翁之近者簪蘇門之遯民絙枯桐之一絃匪無
絃之寂默異五絃之啾誼對阮子惟長嘯為嵇生纔一
言人欲怒之戲排諸淵勃宰而出則又粲然彼何知夫
坐愁幾蹢躅乎樂天矣然聖人猶以謂樂天有憂之大
者也況憂人之憂豈有既哉於是翁泛然可油然謝曰

憂樂外矣吾當虛之

坐進庵賦

有物于此無梁無柱圓廣六尺非囿非窳粟米之宅上
蒙藁秸下履瓴甌塗墁晦外中腹純白平時鼠竄俯仰
不迫主人懵學敢謁之客客曰此夫外邱阜而內穴谷
者歟上荷笠而下湊輻者歟首支撐而身純束者歟有
登降而無阼賓者歟混沌既死竅鑿乃張牖則有目戶
則有吭槽巢營窟太古所藏周旋無間病於德方邑都

莫賢原野則良者歟雖然可以五人羣居宇宙有餘不
可以八口次且孰知婦姑彊名坐進其實中虛聞諸博
識是謂屠廡

雞肋集卷一

欽定四庫全書

雞肋集卷二目錄

古賦

北渚亭賦

是是堂賦

北京官舍後梨花賦

後招魂賦

披榛亭賦

雞肋集卷二目錄

欽定四庫全書

雞肋集卷二

宋 晁補之 撰

古賦五首

北渚亭賦

北渚亭熙寧五年集賢校理南豐曾侯鞏守齊之所作也蓋取杜甫宴歷下亭詩以名之所謂東藩駐阜蓋北渚凌清河者也風雨廢久州人思侯猶能道之後二十一年而祕閣校理南陽晁補之來承守之侯於補之丈

人行辱出其後訪其遺文故事廬有存者而圃多大本
歷下亭又其最高處也舉首南望不知其有山嘗登所
謂北渚之址則羣峰屹然列於林上城郭井閭皆在其
下陂湖迤邐川原極望因太息語客想見侯經始之意
曠然可喜非特登東山小魯而已廼撤池南葦間壞亭
徙而復之或請記其事補之曰賦可也作北渚亭賦其
詞曰

登爽邱之故墟兮睇岱宗之獨立根旁礴而維坤兮支

扶疎而走隰跽琅邪與鉅野兮梁清濟而北出前滌漫
而將屯兮後摧雍其相襲垓者扈者嶧者峘者礪者礪
者障魯屏齊曰惟歷山或肺附之箕拱環連勢厓絕而
脈泄兮萬源發於其間谷射沙出漫淫渠澱澆潏汨泌
澎湃渤滴忽漢起而成川經營一國其利汾澮防為井
沼壅為碓磴得平而肆廼滉漾而滂沛經民間而貫府
舍兮渚為池之千畝惟守之居面巖背阻邈閨闔之遺
址兮肇嘉名乎北渚悲經始之幾何兮牛羊牧而宇顛

非境勝之為難兮善擇勝之為難嘗試觀夫其園千章
之萩合抱之楊立而成阡躋歷下之岩堯望南山之孱
顏脩榦大枝出櫺造天藐矧岫之蔽虧乍髣髴其雲煙
思僊人之樓居尚輕舉而高飜盍駕言其北游登斯渚
而盤桓岡巒忽其翔舞萩楊眇以如箸撫千里於一睎
收城郭乎環堵其下坡湖汗漫葭蘆無畔菱荷荇藻蘅
荃杜蘅衆物居之浩若煙海歲秋八月草木始衰乃命
罾罟觀漁其雉鳴榔四合方舟順涯鱸鯉窟乎溪塘兮

鴻雁起於中泚復有桂舫蘭枻浮游其中榜歌流唱自
西徂東纖餌投隈微鱗掛空客顧而嬉傾盃倒鍾明月
出於缺嶺夕陽眇其微紅天耿耿而益高夜寥寥其方
中駭河漢之衝波披海岱之冷風恐此樂之難留兮願
棄槎乎星渚期韓終與偓佺兮采芝英乎瑤圃庶忘老
而遺死兮路漫漫其脩阻於是酒舍太息中座語客曰
自晉太公奄有此邱是征五侯桓公用之攘狄尊周方
其盛時山河十二號稱東秦臨菑遨樂中具五民秋田

青邱實圍海濱而薛又其小邑也區區之賦食三千人
其疆孰與比哉觀華不注竭其孤巘虎牙桀立芙蓉菡
萏尚想三周追奔執轡下車取飲僅以身免困責質於
蕭同尚何私乎紀獻而齊自是亦不競矣夸奪勢窮雖
彊安在事以日遷而山不改則物之可樂固不可得而
留也認而有之來不可持所玩無故去何必悲此齊侯
之所雪涕而晏子之所竊嗤也今我與客論古人則知
迷屬有感而歔歔豈不重惑也哉仕如行賈孰非逆旅

託生理於四方固朝秦而暮楚曾無必於一笑尚何知
乎千古於是客覲然喜再拜舉觴而前曰凡主人言理
實易求而我曠然已忘筴憂使客常滿使酒不空請壽
主人如漢孔公主人亦覲然喜受飲反觴執客之手而
言曰詩固有之未見君子憂心忡忡既見君子云乎不
樂再拜洗觴而酬客舍然大笑

是是堂賦

是是堂彭城劉子義仲之所作也劉子讀古人書則曰

文王我師也周公豈欺我哉處今行已則欲就有道而正焉抑荀子所謂是是非非謂之智者以名其堂而居之而南陽晁子補之聞而疑之曰劉子果於自信果於不信人也哉夫理無常是事無常非使天下舉以為非而劉子獨曰是將誰使取正使天下舉以為是而劉子獨非之安得力而勝諸嘗與劉子問津於無可無不可之塗而弭節乎兩忘之圃夫安知吾是之所在故賦其名而連牴其義則操吾戈以伐我者遠矣其詞曰

隘區中之無覩兮邈荒忽以遠求軼太始以為元兮日
與月之幾周本獲鼎之推筭兮四千歲其已多謂過此
或不遠兮世倏眴而謂何紛蛇身與牛首兮詭變化之
莫原神與民其雜糅兮或傳之於余先川東南而辰西
北兮余不知其何故惜絕維與折柱兮又孔氏所不語
莽湯革之相質兮賊一世以共疑一身吾不自識兮疇
莫覩而能知邇吾輶乎八埏兮旋吾舳乎四海斲不死
之遺氓兮稽吾聞之所在曰七聖至此而競迷兮羌誰

使之正女竭輕舉而遠游兮吾將從巫咸之所處離屯
雲以衛屬兮前犇霆使抗旌王良御以蹕蹕兮河鼓隱
其砢磷涉橫潢而濯淹兮借斗車而轟轟九虬蜿以承
綏兮六鳳翼而繽紛載格澤而雉厲兮歛耒撤扨捐旬
始而遺攬搶藐無朋吾孤往兮騰光景之所經俯六合
以周流兮觀一氣之所營叩滴湟之何居兮問黔羸所
休屯芒東西之無軌兮沕晝夜之無門追汗漫而與言
兮若不見而不聞將下車而從之兮則竦身而遐征忽

寐寤而莫質兮形欺魄而獨存神黠晦而載浮兮涕淫
夷而霑襟聞佞僞之達者兮將與議夫本根斬乎保已
而不失兮何足與論此之至神鵬南徙而終息兮彼安
知夫天地譬井蛙之跳榦兮吾亦安知其孰智謂道非
物之外兮盍反求諸世間泮得失之兩塗兮一智者之
足明世溷濁而智鮮兮薪得鹿而國爭曰吾不知孰是
兮據有鹿而偶分待黃帝以占夢兮曠百世而莫尋雖
人跡之所至兮如窮北之衣皮聞中國之有蟲兮咀葉

飽而吐絲化草木之所染兮煥五色而陸離所不睨而
懍懍兮咸莫信而我非饗香以為朽兮視素以為黑有
迷疾而慮易兮意是者之反疾衆謂西施美兮何高舉
而淡潛魚熊掌以為羞兮帶螂蛆之所甘物各驚其所
知兮孰為是而正女蹇多知而博辯兮盡質諸魯之君
子曰經禮三百兮曲禮三千非堯舜禹湯之適兮為他
道而勿傳守株以待兔兮卒不可得從女以決疑兮而
增余之惑規吾觚以轉圜兮如二兒之于國權謀既不

用兮仁義又見賊哀失時而齟齬兮改此度誠不能陳
瓊茅以潔中兮懇神龜以吉占朝從而算違兮吾安所
行女意王倪蹲循乎不知兮齧缺昧曹於同是違一世
何不可兮山澤又多龍蛇溪林杳以無人兮雨雪零其
來加前夔魑後虎豹兮獨狻笑而施施石嶠嶠嶰嶰以
增波兮路阻難以委移結幽蘭以獨立兮歲將暮而增
唏懷同心之離居兮悵猶豫而孤疑必處廓若此而後
可兮雖濟百世何足以嬉譬鄙夫之硜硜兮經溝瀆其

誰與懷古人之兼善兮吾不忍抱吾之所獨五官異用
分物各派吾之一以聞聞性兮一非有異回車易野兮
絕道九州吾既不從夫斯人兮盍反吾之初修闔萬宇
以聚閭兮載百族與並游人羣固有倫兮生固有涯蠶
桑而被兮粟以禦飢吾何以異於人兮曾蹊跂而支離
伯夷死名兮盜跖死利溺者入水兮拯者亦用以顛沛
曾稽失之未暇兮羊固已遠去而千里重曰道無封不
可畔兮雖千歲由今日忘彼與是兮吾何愛嫉棄虛無

以為興兮託不得已以為鄰忘處石而出火兮超同物而獨生

北京官舍後梨花賦

梨於經無記而舍後梨人所不賞故賦之其詞曰

攬察草木本原所起李梅紀於隕霜兮橘柚隨乎織篚
木瓜足贈而詠詩含桃可羞而記禮雖信微而有託兮
亦不委夫厥美惟茲梨之俊茂兮羌獨遠而未揚含溫
潤之秀質兮皎若和璧榮其光澹暗處其無偶兮歷年

歲之已長暮春者陽瘴憤盈羣木解膚似夸者似鬪者
似戰者似頽者色非一色同嫵殊嫵茲梨娟然獨見其
素繁過時兮不省滋脈脈兮後戶亦何必耀榮華兮朝
日顧猶私兮泣露然而中唐之樗枝大扶疎以其近人
人以繫駒則磨則齧則折則泄孰與夫朽壤幽薄厥植
雖弱履履不蹈根乃磅礴

後招魂賦

屈原作大招魂宋玉作招魂夫士以忠放濱於死故招

其魂而復之予交之長者王安仁賢且孝適未仕病以天子傷焉不敢以非吾上也借不知命之辭以愬于帝作後招魂

竊悲夫天何為生此碩人兮蹇幼清而宜脩既服義以時可兮又何為委厥美而改求天固復諸其初兮則如勿俾此昭質帝命巫陽曰有愬于下汝往聽之精神將離筮而復之巫陽曰物死與生司命有職自廢自起朕何能識帝彊之乃下招曰魂兮歸來去君七尺之軀胡

為乎大陰些舍君之靈龜而糟茅沈些人固懷慈而抱
愛兮一言欲訣而怛怛些君胡樂誘於異物兮從之蹠
跂而遠行些魂兮歸來上天不可以游些有神當關其
視畏人些其下百鬼伺人往來執而殺之些徜徉無所
倚歎息不可些幸而得還無所求階些歸來歸來不可
以久放些魂兮歸來地下不可伏些土怪墳羊狼戾突
觸些蛇身鬼首蓬髮鬚鬚當前搖毒些九幽之府惡厲
牛首得人以械獄些歸來歸來不可以久屈些魂兮歸

來無止乎山中些山木蕭蕭猿狖所居些藜藿柱逕臬
祥鼉怪杜鵑號呼些夔魍罔兩笑風涕雨見人擲揄些
虺虎封狼磨牙吮血僦僦穴居些魂往顛躋狂惑失塗
些歸來歸來久幽恐不得出些魂兮歸來君無下海些
大海盪漚日月回周些白波連天五山狂浮些巨神操
蛇唯魂是因些淫氛瀰霧八方錯易魂往安投些百怪
謹舞羣出類沒更遨迭遊些霹靂掣電蛟龍直起江潮
逆流些有鳥九首載鬼盈車擢筋以縻其軻些歸來歸

來久淫恐不得還些魂兮歸來君無樂兮八蠻九夷些
遐方異類其人似禽些烈陽慘陰韞裘裸裎涼溫不時
些蔽林夜祠被髮徒跣妖魅叢嬉些魂往非族抵冒凌
欺些歸來歸來恐自遺羞些魂兮歸來君無以髑髏為
南面之樂些毛枯骨化精離識落些螻蟻所寄烏鳶所
搏些蚊蚋姑嘬狐狸齧些髡然七孔攘擲疇覺些棘
薪葛蔓交錯綿絡些鋤耰野火侵凌甚虐些歸來歸來
無自遺賊些魂兮歸來八紘六合無一可以翱翔些魂

孤廷廷消耗淪亡些歸來歸來反故鄉些工祝前君無
迷方些崇城兩溝夾高楊些車軫馬駢交康莊些日中
為市集工商些高門懸箔襲慶祥些選閱甘旨薦北堂
些金昆玉季美雁行些斑衣竹馬兒嬉傍些曲欄橫牖
窈洞房些長蛾曼綠含芳些齊紈阿錫曳明璫些夏
瑟鼓簧封豕羊些食前方丈醜椒漿些嘉賓雜坐紛賢
良些朱顏欣欣君樂康些魂兮歸來反故鄉些亂曰龍
火頽坤兮虛正宵萬物酋勑兮傷秋郊汨君徂征兮默

誰曹天地為鑪分物流以銷一受成形兮巧專莫逃斯
彌頤輅兮一體所交鼠肝蟲臂兮忽何遭魂知復吉兮
改而超與君除被兮三下招張君之衣兮升屋號魂兮
歸來居匪遙無哀我心使予勞

披榛亭賦

舒陳儀甫官於魏覽觀公圃廢城之堞墾其土作亭堞
上名曰披榛斬木枝為梁柱管蒯衣之目踰四垣矚五
里外進客而語曰樂哉此亭客曰微主人言之固願有

謁也今夫山居者遺世遠舉煙霞之府屈屣之顛翠微
之顏穹石曲隍上正宛中如堂如防猱攫之所處首更
奔星高出雲霧足蹈太虛下見雷雨邈乎杳冥一攬九
土此人以登邑門之垓蹤步齟齬若絆若禦若見陸櫓
遊意無所至於平原案衍秫麥之土漫漫漠漠蔑有堆
阜下澤之車短轂幘爾晝日旁午出汗霑滑此人適逢
沙邱宿莽廣不蔭路怠而願息解轡弛負相攜偃僂忽
如飛翔延頸顧慕矣若廼平時室處矇矓環堵窮年不

出四壁為伍周以關閉域以牖戶如彼井谷潛逃之鮒
衡從北南適在跬步仰而視之不識天宇此人出城而
望見桑麻綠野猶將樂之況乃矗乎巍巍據城之陴出
屋之危前無蔽虧俯首而窺哉夫明不求晦處內慕外
各以其不足所遇生貴雍門之技悲者驚心鍾儀見繫
尚猶南音主人殆倦遊窮居者耶不然何以趯然於此
而志意洋溢也嘗與主人周覽五嶽岱嵩衡霍巫廬九
疑白鹽赤甲青城峩嶠歲暮溪林攀援桂枝結軌羨門

高谿方駕赤須安期委區中之跼蹐遊太上之無涯則
主人樂此耶嘗又與主人服纖離騶騷耳夸父前塞魯
陽奉轡超人跡馳萬里以觀乎八紘九野觚竹北戶與
西王母日下之地扶桑月窟紫淵丹水大章所步盧敖
所履殊方怪物齊諧之志焜煌譎誑經目而記則主人
樂此耶嘗又與主人觀乎京洛神州宋魏兩都未央建
章天子之居前殿武庫金闕玉除東華耀靈西華望舒
複道氤氲飛閣渠渠千官鏘鏘劔佩以趨朝會而出冠

蓋布達富貴潤奴隸衣食仁里閭則主人樂此耶嘗又
與主人技術孫吳抗技頗牧左象弭右魚服韓厥中御
州綽為右馮軾而寓目以觀三軍之斬伐擊刺琅琅磕
磕風起雲會北登燕然躡轡長塞西屠石堡飲馬瀚海
麒麟圖形贖死胄代則主人樂此耶嘗又與主人出咸
陽經上蔡過邯鄲桑中大隄石城之間士女亟會倡樂
止客盃酒相索吹竽鼓瑟鳴箏擊筑六博蹋鞠宛珠之
簪傅璣之珥羅裾從風衆曲入耳人生得意亦何能已

則主人樂此耶主人油然而笑曰人壽幾何而時易失
細猶不果巨安可必溪山大澤實生龍蛇高明之家鬼
瞰其室吾非以狹驕廣以儉笑侈也狹易治儉易供此
吾所以樂也窮秋九月狐狸出穴宇宙隆冽時亦登吾
亭而支頤藂棘之分披朱實之離離秋風鳴枝久而不
去羣竅盡奏若歌若歎起左作右時亦杖藜隱几而聽
之寂寥兮無為淡乎熙熙似遺已離物而不知飛鴻滅
沒夕陽就微月出埤垧樂而忘歸則客亦樂此乎哉於

是客曰我以衆夸主人而主人以少奪我主人賢哉非僕所及也

雞肋集卷二

欽定四庫全書

雞肋集卷三目錄

辭

望渦流辭

追和陶淵明歸去來辭

返迷辭

冰玉堂辭

漫浪閣辭

遐觀樓辭

樂哉侯之邦兮樂哉侯之堂兮

二章美澶守韓侯也

維夫君兮桂舟一首送梁正受歸汶陽

山坡陀辭

白紵辭上蘇翰林二首

江頭秋風辭

琴中宮調辭

雞肋集卷三目錄

欽定四庫全書

雞肋集卷三

宋 晁補之 撰

辭

望渦流辭

渦之水西流過譙郡北乃稍南又東流入于淮包渙二
水皆經其南以東歲旱溪不五尺秋雨集始大而城之
東北惟渦曲水溪黑灌木蓊然舊有祠曰龍嘗宅焉作
望渦流其詞曰

望渦流兮浼浼勢南折兮東還水衝隈兮岸圯嗟龍去
兮幾年俛余進兮藪祠儼帝服兮神冠牆壁績兮怪竒
泯虵穴兮蝸盤列缺鞭兮雷輶衛兩鰻兮驂鱸老龜起
兮霧游跂瑇瑁兮鼈鼉或若馬兮非人紛陪後兮導前
木陰陰兮藻長科斗舞兮下顛儵羣出兮旅嬉忽俱去
兮不還意土國兮無龍恐逃桷兮藏櫓帝有命兮時瘳
亦隱隱兮填填世鏤石兮流金將誰識兮此愆包之水
可揭也渙之水可厲也前汝足其暨也後汝跗其躋也

江有鯢兮橫淵海有鯢兮翔天汝隘此兮往爭滔淫水
兮八埏重曰望其厓若有宅於隈不汝爭於厓汝安其
隈澤不必施也

包渙二水
與渦並流

追和陶淵明歸去來辭

辭長而歌短歌有和辭無和也言語文章隨世隨異非
擬其辭也繼其志也作者七人矣詞曰

歸去來兮吾無以歸奚以歸既身不足以任責畏首尾
而心悲慕往筭之經世嗟吾力之莫追彼辭位而灌園

豈吾今之獨非雨冥冥而荷笠榛莽而蹇衣我行野
而視天覺寓大而身微乃矜蚩蚩止驅息奔背隍築室
面坂植門三綬從褫圖書尚存忘瓢落之可憂比浮海
之為樽蹠太初而游意弊無極而彫顏反國蝸而自足
俯巢幕而亦安解子轡之沃濡兮脫予牽之間關識鳥
鳴而物華陶陽氣以流觀悟息淵而消枝亦瑾戶而俱
還惟文字之幼工則雖老而桓桓歸去來兮彼河濱之
善游或往學而卷生復裹糧其安求善陶生之達情不

與世分同憂實迷途其已遠懼斯人之莫疇或待兔守
株或遺劒刻舟雖成事之不說聚悔踰於山邱庶西方
之至言聊反聞而逆流守一靜而為君亦何往而不休
已焉哉一晝一夜成四時子之歎川逝不留顏光不可
使東之韓終王子喬汗漫難與期俯寸田之荆棘曷不
旦耘而算耔悲在堂之蟋蟀慙不樂於唐詩悟死生之
如夢亘今古而無疑

返迷辭

五達歧行者迷茨萊蹊虬蜴嬉杳淒淒莽離離赫隆曦
可還時日黯西與誰期往不思逢詭期死獨貌安可知
亟反之大道夷都邑差車馬馳冠劔祇志可持能足施
貴名坐好爵靡儼罇卮饜梁肥窈室帷安厥妃觀盈虧
浩浩移逝不遲咸若斯何綏綏不返為從魑夔神索衰
今狐疑後當悲我此詞如泰龜

冰玉堂辭

冰玉堂者始前門下侍郎眉山蘇公子由哭故廬山隱

君劉凝之與其子道原之詞所謂潔廉不撓冰清而玉
剛者也鄉人聞之其賢者喜其頑與懦者皆廉且立則
相與採冰玉之語以名君堂而祠之而前起居舍人譙
郡張文潛又因其名以為記蓋君父子博極羣書道原
尤精史學而皆耿介守義不偶俗以沒世慕而傷焉故
門下以謂夷清而餓死惠和而三黜道不與命謀非和
實得非清實喪而起居以謂司馬談與遷文學美矣而
無聞於風節疏廣與受風節同矣而無傳於文學蓋門

下至借君父子以論夷惠起居合其長謂過漢四人者以是知君父子為一時知名偉人所愛而推之無間然者如此則夫冰玉之名非鄉人故舊者之言也天下之言也補之生雖晚猶與君父子並世而不及識既為館職修國史實錄盡得道原所著十國紀年資治通鑑外紀諸書而觀之且門下補之所嘗事而起居所嘗游也因其言以益信顧雖不及識與夫識而知之者自以謂淡且遠矣又與君之孫義仲游相好元符中以罪遷玉

山道出星子求君父子所葬而拜之五老巉然臨其上
水交流其下松柏一徑如幢節行路耕者咸指而言曰
此劉君之葬也則皆有敬容因喟然太息順塗而詠曰
皎皎白駒在彼空谷劉君於是無愧乎天下之言矣既
而復曰屈原以讒放而死而君父子進不犯難退而仗
清節以沒與原異於原不更愈乎推此志也雖與日月
爭光可也況冰玉乎哉凡楚人之詞皆傷夫中正不遇
者而作也故以若詞弔之曰

論世以觀士兮集義以為詞所非正而敢從兮日可星
而東之嗟若士之弗獲兮羌何忿而負石繫聖賢之出
處兮惟遵道而守德鳳覽輝而乃下兮雖猶耻乎腐嚇
非九方之為使兮夫何足以得馬廬岑岑以鎮楚兮洵
大江之東淒分陰陽之晦明兮鍾斯人以正直惟天道
與地寶兮非所求其猶愛與之全而不用兮懷斯美以
固在大固不可以適兮方固不可以圓試回功謝於土
穀兮夫乃同道於禹稷譬人生猶吹呖兮無得喪之可

齊紛吾何指以為正兮服吾初其庶幾

漫浪閣辭

南康劉義仲壯興志操文義蚤知名於士大夫年四十
矣而學問亦苦葢不欲一日棄其力於無用也築屋廬
山其先人之居自號曰漫浪翁意以比元結從仕與物
皆不得已也豫章黃庭堅魯直曰壯興未至於翁行已
立志不可謂漫浪者潁川晁補之无咎以為知言壯興
曰請極其義補之曰唯其詞曰

沛高皇之受嬴兮劉別子曰楚元羌好詩而說義兮敬
設醴於穆生戊始怠而穆去兮申白笑而鉗市富傳孫
而失國兮派辟疆之支子爰清淨而少欲兮以身悟乎
霍光蹇孫向之洽聞兮至耆老而彌良曰衆賢和於朝
兮萬物和於野粵百世而能調兮民胥來而鳳下惟劉
有後於楚兮千歲發夫道原流其芳以益遠兮偉壯興
之不愆原惟博而好直兮向異世而復起興惟進而未
已兮載向學亦不墜彼元結之信修兮羌何為此漫浪

也將履中而晦外兮其德固天之放也惟漫浪之為言
兮匪正則之嘉名豈其懲屈之死忠兮欲猗移以保生
結當易之一爻兮幽人履而正吉興方壯而惡畫兮棄
爾輔欲誰賴吾語子漫浪之可兮遺物往其庶幾苟畏
人而羣於人兮拭唾面其猶殆朝騁望乎紫霄兮夕歸
次乎左蠡五老兮在上星子兮在下垂瀑介於高邱兮
洞溪林而北靡飛梁亘於三峽兮條異景而殊世青松
屋兮桂宇辛夷房兮梅戶蘭糗兮菊粳蓀體薦兮肴若

芳雲駟兮霓輶歲將晏兮誰與游煙為衣兮水為珮君
誰須兮林之際吾以漫為旌兮建彼太虛之上也吾以
浪為察兮周彼八荒之外也邳萬里而不逢人兮御謁
我以宜止晡轟轟而曠洶洶兮羌何以辯乎明晦彌高
出於千仞兮羣鳳過而北南彌幽徑於雷室兮列缺驚
而後先求佺僑而不得兮咸勃窣其在下乃山澤之臞
兮夫何足以跂而望我茫吾不知其所如兮黔羸告我
以何舍出無陰兮入無陽旋丹崖兮匝大荒忽臨睨夫

故居兮羣梯危之蜂戶偃白叟之扶童兮迎謂我以良
苦返吾稼兮復吾樵山嶴嶴兮江滔滔興先人之善俗
兮雖百世猶未改彼魯衰而斷斷兮吾老穉以知耻匪
禮失而求野兮民固化於不怵興克家而好常兮庸謹
行以毋傲懷向原之遺直兮念爾祖而履薄陳洪範之
九疇兮叙三統與七略以為博而弗考兮蹇無用而束
閣紛興世之多賢兮匪曲全而好修惟仁宅與義路兮
羌可居而必由結信賢而自晦兮忘其同物以迷世鳬

與波而上下兮夫固非駒之所喜亂曰接輿詭而悟聖
兮匪沮溺亦楚狂聖與言而莫顧兮人以為知乎大方
既不足用吾中兮吾將從回憲之所臧

遐觀樓辭

窘牆堵之伏潛兮登斯樓以遐觀匪吾居之為隘兮乾
坤冒其孟盤仰攀薨而拊楯兮宇曠曠而益寬彼何大
而能舒兮吾何眇而莫閑霜肅壘而木枯兮潦收竇而
澤乾蓬鳴野而相追兮知海冰而天寒左睇兮城闔右

盼兮林垞商賈紛其晝兮陶冶翦其煙興之杳杳以
在東雙柏近而青青物暇遽之不同兮余亦不知其何
情聊浮遊以相羊兮初怫鬱而中清彼塊圯之無垠兮
人駒隙之暫更道本夷而世險兮夸奪饜而卒平周垣
兀其跨衍兮逝千古於樵耕春與秋之不淹兮歲忽忽
其崢嶸招搖指於北陸兮澹黃宮之陽生固天道之反
覆兮氣默會而孤萌朝卷箔而極望兮稍霧廓而日晶
及暘景之方中兮晞余髮乎南榮浮雲起而景翳兮四

冥合而覩星風撼撼而感軒兮雀啾啾而赴楹收百為
以清慮兮施余綢而榻橫漠洶洶而非聲兮邈冉冉而
非征形欺魄而若存兮神無虧而靡成目瞳矐而罔覲
兮坐待日之方升夜寥寥而未央兮羌不寐而無營

樂哉侯之邦兮樂哉侯之堂兮

二章美澶
守韓侯也

樂哉侯之邦兮封楚宮與復關美哉洋洋水兮崑崙始
乎并川桐離夫其實兮綠竹兌於邱園三年庶夫有成
兮蹇吾師其永歎營室壁而建墉兮參國一其可觀塗

椒邱吾駕車兮攬予騑之嘽嘽襲予旆之悠悠兮侯降
觀其于田春陽滿其親天兮乃物作而芄蘭來吾省夫
在疇兮介黍稷之有年侯寧般于遊兮無非事而不煩
羌信修而好我兮曷懷歸而翩翩洵侯邦之可樂兮攜
手其同歡 樂哉侯之堂兮高門桀兮蘭錡切雲冠之
峩峩兮四牡矯兮戾止夜悠悠其未晨兮紛侯庭之徒
履雲容容而承楣兮日澹澹兮階祀雨雪睨其將流兮
黃宮動乎子美爰俶生之煌煌兮又尚茲夫介祉嚴若

植其姣服兮侯何須兮堂際進蕙幃予稱觥兮芬予席
之蘭茝朱顏忽其滿堂兮五音昌兮來會藐姑射之綽
約兮愿慤保而為使洵侯堂之可樂兮與日月其無圯

維夫君兮桂舟一首送梁正受歸汶陽

維夫君兮桂舟酌余酒兮攬君留君何為兮此野菊菲
菲兮蜨下韡韡兮煌煌爛金敷兮襲余堂茱萸兮芙蓉
衆芳越兮亂五風飢咀兮靈芝君歌樂兮余和之日下
兮野陰澹忘歸兮中林橘棟兮梅宇紛瓊茅兮被南榮

白羽兮黑翮邀僊人兮語此文余高馳兮世之外君哉
舉兮先余至襟帶兮東方旦爭門兮汶之陽大野兮始
波翔鷁鸛兮嗥駕鷺羣宿兮迷陟旅食兮殫穗霜肅肅
兮葉方下君欲濟兮淹回水通道兮躑躅冠如箕兮帶
長缺里千室兮士一喙余不善兮紛余悴世謂折揚好
兮余白雪而莫知棄火布而以為垢兮胡不浣炎而振
之彼鎔邪而能言兮工謂余以不祥聊逍遙而挫銳兮
蒙黯黹而益光

山坡陀辭

山坡陀兮下屬江勢崖絕兮濤波所盪如頽牆松鬱律
兮其高百尺旁枝虬驚葛藟之仰不見日兮下可依吾
曳杖兮吾僮以吾之書隨邈余望兮水中泝頽然而長
者黃冠兮羽衣軒頤坦腹濤石箕坐兮石亦有趾安不
危四無人兮可忘飢僊人偃佺兮自言其居瑤之圃一
日一夕兮飛相往來不可數使其開口而言兮豈惟河
漢無極驚余心默不言兮蹇昭氏之不鼓琴憺將翔兮

山海與日月兮常在若有聞兮夢中仇池我歸路此非
小有兮噫乎何以樂此而不去管余遊於葛天氏兮身
非陶氏猶與偕樂渺莽良未可兮僕夫悲余馬懷聊逍
遙兮容與晞余髮兮蘭之渚余論世兮千載一人猶竝
時歧又有歧兮余行詰曲欲知余者希戔戔洋洋余方
樂兮譬余擊舟於水魚沉鳥揚亦不知何必每念輒得
應余若響坐有如此兮人子期

白紵辭上蘇翰林二首

白紵焚莫緝，紉蘭作衣袪。朝今日所暴，算分雨所濡。木
瓜諒微物，期報乃瓊琚。芳華辭甚妙，贈我不如無。

上山割白紵，山高葉撼撼。持歸當戶績，為君為絺綌。不
惜潔如霜，畏君莫我即。誰言菖蒲花，可聞不可識。

江頭秋風辭

雒陽客後車，結駟傳燭食。人生富貴不易得，江頭秋風
旦夕起。胡為翩翩雒陽陌，雒陽陌吹塵埃。江頭樹安在
哉，秋風起菱花開。鱸魚肥歸去來。

琴中宮調辭

神僊神僊何處青山裏白雲際不似人間世源上正碧
桃春清溪乍逢人住無因憶紅塵出洞花紛紛



雞肋集卷三

欽定四庫全書

集部

雞肋集卷四

七

詳校官庶吉士臣初喬齡

侍讀臣孫球覆勘

覆校官主事臣李駿

校對官中書臣王鍾泰

膳錄舉人臣劉禮

膳錄舉人臣閻學朱

欽定四庫全書

雞肋集卷四目錄

古詩

擬古六首上鮮于大夫子駿

西北有高樓

東城高且長

亭前有奇樹

冉冉孤生竹

涉江採芙蓉

生年不滿百

建除體二首荅魯直

八音歌二首荅魯直

感寓十首次韻魯直

西歸七首次韻泗州十五叔父

感興五首次韻李希孝

飲酒二十首同蘇翰林先生次韻追和陶淵明

雞肋集卷四目錄

欽定四庫全書

雞肋集卷四

宋 晁補之 撰

古詩

擬古六首上鮮于大夫子駿

西北有高樓

西北有高樓縹緲齊清周欄十二折飛鸞結丹楹上有絃歌女充耳以黃瑛當窗弄白日顏若茗之榮陽阿奮哀響梁欂有遺聲不惜厲清商零霜飛園英誰為聽

之者皎皎自知名幸承遺襍眷同車以遐征

東城高且長

東城高且長下瞰阡與陌谷風麗百草春華紛已白良
時忽如此馳景一何逼喟彼飯牛詩終年守寒阨恭儉
夙所敦葛屨傷褊窄身為物逆旅生乃遠行客豈無百
日蜡樂此一日澤美人顏煌煌奇服爛五色彈箏奪新
響盃酒縱相索鬪雞逐狐兔六博呼一擲貧士悲失職
坎壈何所迫安知黃鵠舉隨時振六翮

庭前有奇樹

庭前有奇樹好鳥鳴啾啾
朱榮被紫萼采掇以忘懷
棄置而不省秋風淒以摧
不惜朝華暮君行殊未來

冉冉孤生竹

冉冉孤生竹託根中谷卑
結髮事君子江離近華池
江離榮有時迨此春冰期
玉盤有嘉餐思君以忘飢
棗下何纂纂朱實亦離離
秋風一披拂苑其為枯枝
願墜太陽惠照妾葵藿微

涉江采芙蓉

涉江采芙蓉江上零露滋方舟不能度日暮白蘋悲清
波有鳴鴻蕩漾安可期幸因南風逝寄言欽所思

生年不滿百

生年不滿百一日何三秋花開苦多雨何不張幕游行
樂時不再春榮豈長在古人輕尺璧愚者昧所戒君看
龍與虎飄忽不相待

建除體二首荅黃魯直教授

建策移漢都奉春緣衣布除地願見公乃以舍人故滿
船載明月且復酌清醑平旦襜褕出牛羊下來算定境
要兩言出處非竝趣執臂欣逢迎秋蘭在堂下破甑雨
生衣蹇不改茲度危莫如人心難莫如行路成事安得
悔來者其可悟收拾不須陳千言一棄屨開門見井市
終歲紛遑遽閉門面牆壁少日豐暇豫

建鼓求亡子初昧學所之除去日月多及此歲未遲滿
國和巴人若士誰與知平陸不推舟客行當來茲定居

厭屋廬風雨勞所思執鞭慕管人孰與並此時破裘不
御冬要假完腋裨危言則來詒慎密又逢譏成德尚如
是薄志安能期收聲復藏熱雷火忽然微開口且復歡
是事置勿推閉眼可內視獨復不自為

八首歌二首荅黃魯直

金蘭況同心莫樂心相知石田罹清霜念此百草腓絲
看煮繭吐士聽憤悱語竹馬非妙齡美人恐遲暮匏繫
魯東家今君尚天涯土膏待陽暉氣至如咄嗟革薄不

可廓士迫下流惡木無松柏心蝸處螻蟻託

金丹妙通靈子有遺世術石髓不成餐閔予多滯骨絲
聲紡事算搗聲寒事來竹葉將菊花及時同一盃匏器
祀天地貴質不貴華土緣井渠繁生氣泄大和革面固
非性小人變丹青木雞本無心風雨安所能

感寓十首次韻和黃著作魯直以將窮山海迹
勝絕賞心晤為韻

鳴鳩興獨居百兩誰與將未見憂忡忡既覲為龍光吹

竿沸齊市零雨暗空桑寒歌牛軛底激烈氣彌剛

雁以無能亨鼠以有技窮古來達生者神不馳其胸物
或似而非藁本奪芎藭臧否何間然吾師阮生風

倉鷄知陽春喬木聲關關白駒不食苗奈此空谷寒替
有丹徒士檳榔貯金槃富貴懷隱憂無寧歸故山

吾期瑤之圃玉英良可采崑崙在萬里積石更磊砢學
經儻無用詩禮發含琲叢臺尚何為袷服若煙海

鼓吹出西羌光華動眉額韃橐望酒泉面有可憐色念

身匪兕虎少日四方迹百計等畫蛇老大悲故國

謝公文章餘幽事課伐嶺清詩如玄酒胡乃淡而永得
無西堂夢春草句彌勝但使田野傳何須論銘鼎

江南盛鬱蒸代北紛霰雪卞生無出游何以得此刖一
朝有天運春華未萎絕吾猶託雄鳩而彼固不拙

平生莫逆交弦斷寄心賞相思望青楓目極江水上念
當及時節農事動春壤來者不有年何能咎吾往

楚有吹竹者工作百獸音削格為爾多滔滔寧適今嘗

俾範馳驅終日無一禽復之儻或可詭遇亦何心
葉公好畫龍龍固不可晤安知下其室驚駭暗楹霧昭
王亦貿骨冀以得馬故相者競舉肥終然駒遠去

西歸七首次韻和泗州十五叔父

潔腹不受污替人因食薇薇亦周土生悲哉懷永飢武
王與周公聖德天動威奈此二子何猶歎安適歸
霏雨晚霑裳零霜曉被路驅車歎時邁所遇一無故悠
悠天地宇萬物各有聚闕我冰雪姿幽居從可住

算投古店宿夜聞狐狸嗥僕夫告行邁起視月尚高清
霜來何許不覺滿我袍逆舍良非時求前茲已勞

浮雲如游塵倏忽蔽白日登高念搖落歲暮一何疾東
陵種瓜事富貴寧可必人生無南北行樂時易失

驅馬馬走山回車車漸水塗窮我何適慟哭盈襟淚巢
居識風聲穴藏知雨意救鬪曾得傷纓冠亦可已

贈君彼風蘭佩之可為璫贈君彼露荷製之可為裳薄
言茲擷掇道遠莫置傍崢嶸又歲暮與君同所望

古人重生男豚酒慶親戚桑弧射四方言有四方役奉
璋比德性墮地要膂力如何晉公子安樂忘所適

感興五首次韻和李希孝

海鳥御羊角飄然凌紫清有背如泰山未覺毛羽輕鹽
陽亦羣飛日景為不明空倉自苦飢安得有此名

人生須富貴如堠河之清草木競榮華春服亦已輕桑
田自足樂未可居高明君子順天道小人眷時名

長歌遺世情滄浪之水清鑠金在衆口折軸由羣輕君

子貴同塵安事皎皎明儻在子所呼牛馬亦我名
不肯埽一室顧欲天下清少日又不羈頗復鄉黨輕長
年始羞悔耳目尚聰明何須更市藥小女故知名
春半寒未已今晨天氣清彈冠適新沐搔髮亦良輕但
愛百鳥樂復憐一窗明千世寧可期歸耕良近名

飲酒二十首同蘇翰林先生次韻追和陶淵明
少賤足可喜險阻更嘗之為親謀斗粟無意出競時緬
焉効一官報國方在茲寧當不卹緯對酒懷憂疑學道

恨力淺中遭世網持

沈飲非荒宴凜然忽頽山
或人欲問事已醉不能言
古來亦如此名字墜千年
但問酒中適豈計飲者傳

陶公羣於人而無人之情
詩豈世外語世語不可名
東坡憐此翁同調但隔生
形光來戶屢真處人不驚
得酒自醒醉放意無虧成

園林日夕好花繁時鳥飛
少年玩芳物不飲成坐悲
只今未白髮念替已依依
紛華戰吾道決勝當有歸
挫銳

培其根外槁中匪衰念方終日行輜重安得違

一眼異青白口語來啾喧酌一不酌一用意何其偏誰
似子孫子高栖蘇門山時隨嶺雲出又與林鳥還平生
但長嘯獨為嵇生言

高賢衆所懷衆理應取是如何濟衆事難成復易毀功
成身無與天運亦復爾軒裳役羣愚兒曹眩文綺

庭前兩古柏凌霄燦其英問此誰榮枯雪霜見其情榮
枯何足計有酒還自傾熟寐暫展轉覺來一蟬鳴歸休

但如此便足了平生

功名有天命美好無定姿雲夢未足吞聊可巢一枝同
時金門士文學多瑰奇幙被向淮海酣放遽爾為車蓋
豈不榮野馬不受羈

城東故鹽渠自晉誰所開似說全盛時邈焉一長懷穿
渠引江水此計未為乖千帆競算入集浦如鳥栖萬疇
分白浪嘉稻擢新泥恐此太多事且當寄嬉諧疏通養
魚鳥花柳共低迷時時載酒往江上亦忘回

大明唐來寺廢苑西南隅青松拱高阜崎嶇有微途肩
輿病我阜一馬良可驅衆木媚溪壑氣薰時雨餘此焉
可數醉何用葺吾居

蘇公士冠冕復似郭有道知士未達間趣操保耆老精
錮試九火勞倦容不槁為州第飲酒況此年歲好藏鋒
避世故輕敵喪吾寶時來用毫末勲業自世表

東漢有兩士才智炫一時三公往訪事臥病亦見辭偉
明獨不然小道安取茲斯人似水鏡與世破昏疑憂國

不為身百世邨可欺舉盃相歡屬是事亦置之

齋居忽若遺不識身與境頗疑酣中似奈爾輒復醒東坡自云然挈世一裘領是事吾有師安敢囊出穎指窮火已傳豈待得薪炳

安昌漢耆儒樂飲侈亦至東坡儉不固少飲得徑醉愚敢効戴崇正復思其次旁通獲親愛公亦安所貴便坐時一卮彭宣寧寡味

幼聞錦江春欲訪子雲宅叩門問奇字便埽四方跡青

雲看一鶚凡毛愧累百勞公諭伯業齒堅頭未白何當
擺俗累歲月可惋惜

王道無偏黨此語聞諸經高賢如大海亦以衆流成文
饒歎維州刀鋸人所更相如後私怨此語驚秦庭小人
慮事疎妄意鹽車鳴安得如江酒洗我塵垢情

淮南夏早收晚秧亦含風連艫似雍絳千斛輸吳中使
君飲酒樂歲美關梁通安得天下人俱忘楚人弓

十年一麥禾此歲亦難得寄語吾州人不飲良大惑經

時無死市吏責亦可塞先生門弟子佐守同一國舉盃
日相屬有句安得默

堂堂門下公英發自初仕卷舒固以時出處不為已朝
廷登儒輔德禮民有耻岷峨更崢嶸清風在閭里獨醒
固不惡既醉又可紀成王訪落時百室賦盈止吾儕為
國謀私愛不足恃

黃子似淵明城市亦復真陳君有道舉化行閭井淳張
侯公瑾流英思春泉新高才更難及淮海一髯秦嗟予

競何為十駕晞後塵文章不急事用意斯已勤平生不
共飲歎息無與親問道伯昏室何人獨知津各在天一
方淚落衣上巾歸休可共隱山中復何人

雞肋集卷四

欽定四庫全書

雞肋集卷五目錄

古詩

視田五首贈八弟无斁

即事一首次韻祝朝奉十一丈

謁岱祠即事

游信州南巖

北京水後往棣州試進士

次韻王宗正定國與蘇翰林先生黃校書魯直

唱和

次韻孔著作常父館中喜雪

次韻文潛休日不出二首

次韻文潛病中作時方求補外

再次韻文潛病起

雞肋集卷五目錄

欽定四庫全書

雞肋集卷五

宋 晁補之 撰

古詩

視田五首贈八弟無斁

河流之所濡一斛泥數斗我莊當水窮乃比石田瘦尚
無東陵瓜況有南山豆天雨不可期且復鞭牛後
蘇秦不願印廼在二頃田東臯五十畝力薄荆杞填擇
高種苜蓿不溼牛口涎拙計安足為朝往而暮旋

薄遊廢家務待子營糗糧莊奴不入租報我田久荒凌
矜馬到門碑兀牛臥場立苗蒼耳根此策殊未長

家世不為農長安有大第官糧弗充口萬里聊自庇一
從學贅牙世事百色廢賣牛姑補屋歲晚霜雪至

居貧廢文字鉋鋤學苦耕怪子獨伶俜久與地力爭苦
耕又不時狐虺日縱橫高原一釋耒歎息心怛怛

即事一首次韻祝朝奉十丈

平生交游情獨處不可乍邨為一馬飲濁水噴百馬弦

歌高樓上但恨知者寡
丈人遺世心口語儻能借不然
抱幽璞終歲褁幙帔坐令青蠅繁
暫出刑兩踝儒冠成
自誤歸去無屋瓦賴逢里中賢築室各蕭洒及時秣麥
賤樽酒得同把安能效乾沒肩與市人亞居然邑里號
曾墨為還駕況在竈奧間欲耻王孫賈東方錢二百得
米稚啼嗷嘲笑坐窮辰無肉飽伏假尚聞剝啄聲聊復
屣屐迓子常妙工詩蘇李掩曹謝有時醉酖醺大笑翻
盪倒床鼻息惡喚起對殘爔復古志尚奇衆競方獨

暇捫蝨與人言豈不逢譴訝崇朝潔腹坐往往食旁舍
子固業少成議論婉風雅嘗聞莊生說乃慕巨魚化平
居似晏子志念能自下而我獨迂疎通人所譏罵正賴
觴詠中得意自陶寫留連接清晤欲起不能罷是時春
雨餘桑密鳩鳴野城隅園圃近欸段亦時跨便恐百卉
闌晚晚侵朱夏人生形骸累未免俗情詐此理豈外求
猶煩詹尹卦清風穆然在如渴啗甘蔗況我自散材谷
口躬耕者去年秋不在匏瓠緣庭架低回迫榮利妻子

憐王霸橫經亦疆顏已取或人捨但慮宰我愚松柏談
三社翛然一室內黃卷開佳話尺璧競寸陰寧復當論
價吟哦愁肝腎蟋蟀吊長夜鄙俚頗近情持用自悲詫
功名與道義能掌偕魚炙二事良難兼夫子賢點也

謁岱祠即事

澤南三百里極望橫天雲雲端色凝黛諦視初可分崢
嶸介邱像瀕洞元氣屯頃刻有變化慘澹殊明昏天行
帝出震其位生物元不周僨西北川乃東南奔寧知六

鼇死竟使二山淪不有是難傾孰維大塊根嘗聞周官
說實惟天帝孫神靈所鎮守民物斯茫存幽明昭一理
有道惟常尊不覺下馬拜僮奴亦蹲循迺知正直理足
使冥頑敦三王有損益商人所尊神明法或不懼夜行
安得遂以此輔世教庶幾驅驚民算宿太平驛不眠慮
絲棼明朝好天色萬象開胚渾勢橫恒碣盡支壓齊魯
蹲五色冒日觀一握通帝閭恢拓下摧確青蒼上氤氲
泉石競沮洳煙嵐互紛綸高舉躡風海深蹠蹈火輪濤

波卷堆阜一一溟渤吞碁枰視井邑七箸藏松椿碧瓦
峙雙闕紅牆繚長閨願瞻巖闕客內滌邪垢魂賜臣登
絕頂一覽神秀原萬壑射窈窕三壇矗嶙峋莽不覩項
領何能窮胫跟稍稍指鳧繹依依數亭云松列大夫爵
羸識將軍墳瑣屑澗花麗霏微崖藥熏廣大良有以奇
險安足論瑰詭有形上頽然德彌惇得無希夷子倣世
逃深蓐亦有黃冠士相對如麀麀此曹噉草木語道良
未聞解榻坐中觀洗心馳大鈞形氣要得一不然隨物

泯是事亦姑置幽尋聊可勤初疑無字碑瑩潔誰敢文
又怪玉女井高絕何由齋俯穿鬪仙巖鳥下天壁垠側
度五賢堂能經背逡巡劒石危數履女蘿柔屢捫揮斤
八極遠風來袂軒軒廖廓自無梯猶疑天可竇陰谷不
敢視恐落魑魅羣安得遂獨往身如黃鵠翻周流遍五
嶽採掇芝英繁即欲憩圓嶠或當止崑崙衆真迎我語
一笑顏玉溫是中差可樂子胡戀塵樊答此太遺物身
閒猶事君重華迹已遠秦漢事方煩成功屬吾宋五禮

垂後昆皇帝二載春臣備太史負紬繹自帝典頗識康
哉言泥金白玉字願頌無前勲有志類韓愈無書愧文
園臣髮將雪素臣心猶日暎今此在林藪跳身同攫猿
徒觀衆山小愁絕下天門

遊信州南巖

南巖夫何為山作天倚蓋山南豁山腹飛頂覆其外初
如鵬將翔膺擊羣麓背乍似海大魚呀口噉而囁當空
橫廣額架屋喉舌內仰窺駭憑凌俯進愁壓墜嘗聆釋

氏說仰覆各世界千間未可著五畝良不隘清泠氣射
人熱惱從此潰崖奔木疎瘦谷遠鳥幽怪問僧何年居
投老四五輩問客何人來官滿或一再而予與二子高
興偶相戒松舟下清江毛髮數鰕蟹藍輿上峻嶺幢節
望杉檜李侯勛門胄文采山作繪趙君儒林孫嫖美蘭
結珮不為城郭遊繼月此于邁寧知老逾拙意在精賞
退得居溪南山食飲與山對夔魑入興突雲雨出巾櫓
古人戒賤目慣覩誰復貴顧此誠未逢欣然與心會彭

湖兩崖蹙泉作一線霈禪月古臺空靈山自明晦搜奇
獲三勝趣嬾同一慨但憂久聱牙尚喜無蒂芥平生所
驅使詩酒俱好在天涯得吾侶物外從所快便欲登赤
城一觀天宇大

北京水後往棣州試進士

晡時北京城行李上客槎二更無人聲騎馬黃河沙誤
緣柳灘中尋炬知田家道有轉徙人襁負依邱麻雞鳴
不安枕髣髴墟里斜秋瓜抱子母蕎麥亦已華賴茲野

物登爾輩生有涯夜宿冠氏驛旅衾魂夢嘉明發縈長
坂晚開堂邑衙秋陽此方熾流汗霑巾紗處陰甘吾願
聊逸豈在多有風東北來慘慘飛雨加頃時異晦明稍
矚天表霞僕夫為我言塗梗絕行車且還解吾褚中林
侶羣鴉詩書維永夕蚤作從復賒豈不有王事奈此僕
夫何

次韻王宗正定國與蘇翰林先生黃校書魯直

唱和

東國寬市征西山休騎屯時清詩人喜洗濯出佳言淵
源蘇夫子河入莆菖飀軌轍校書君駕驂盜驪奔後來
得濬沖它人孰窺藩譬余學禮素婦祭盛於盆不應麾
門牆尚許酌衢樽夢天九門開燦然列星繁羣公顧我
喜顏若白璧溫赤城何足躡愁絕永嘉孫

次韻孔著作常父館中喜雪

冬旱及茲雪都人銷百憂牆根有宿草餘綠尚去秋新
陽解薄冰大潤升介邱夜聞窗響紗高雲正綢繆明日

天津望寒花翳川流宮中聖人喜癘氣一夕收史占上
日祥知欲遍九州敢任肉食謀官閑欣歲休雖無山陰
船窮巷窘若因却幸葛翁來湯餅有麥牟見神仙傳孔戾金
閨彥平替慕追遊延閣排霄起登臨忘我愁何當聯轡
鑾城苑佳氣浮春郊日可望桑野聽行謳

次韻張著作文潛休日不出二首

張侯經濟術見遇未容心揚子執戟老蔣生開徑深予
亦拙造請素懷愛園林閉門鳥雀喜朝日上駸駸

文史平簪契淮山別離心省中立日直天上青春深買
屋近城塢往來成竹林詩模黃著作吾亦意駸駸

次韻文潛病中作時方求補外

貧爐初著灰濁酒寒不溫鄰張病未來獨負南窗暄昨
日往過之歡喜能兩餐醒醲渙然解愧無枚乘言祝君
抱虛一邪氣襲無門今晨有起色迎笑睂宇軒扶掖兩
男兒總小佳弟昆遣誦寄我詩妙可白玉刊平生俱豪
氣見酒渴驥奔賜休常苦稀晨謁良不開約君向南邦

勿厭敲扑誼公餘未忘飲何必醕十分時平但行樂臥
治安足論琵琶五十面雷雨出鷗絃

再次韻文潛病起

淮浦見之子春風初策名頗訝謫仙人有籍白玉京晚
遇廣文直老交心愈傾同升芸香府偶坐華髮生斯人
自龍性意變難章程酒不疵吝身如秋葉輕自言士
處世何必冰雪清交游滿臺省毀譽半王城不肯効俯
仰畏高侮鰥惇常思老伊潁紫蠚羞吳杭我輒抵掌和

首同磬隨笙小人奉慈親皆嘗小人羹寒衣婦補綻學
續女娉婷日欲江海去心期楊柳青衆木構大廈豫章
何孤撐如子足醫國可容移疾行丹書紫皇告玉篆五
獄形何必陶隱居吞霞養純精訪道自素約諧心期算
齡但恐牽俗緣志大功不成息交屏妻子此語不須驚

雞肋集卷五

欽定四庫全書

雞肋集卷六目錄

古詩

玉溪歸逢甥李相如汴中

送學生李公裕兄弟赴省集

次韻太學舒博士堯文示同志

次韻蘇翰林五日揚州石塔寺烹茶

題四弟以道橫軸畫

桂漿

送舅氏楊通直令陽穀

贈王推官允中

之京師展墓

同畢公叔飲城東

題李成季負日軒

次韻李成季感事

同李主簿叔文飲北莊

夏季

曹州道中二首

病起呈李縣令希孝

贈金堤劉承制景文

次韻四弟以道十二弟叔與法王唱和兼示无

斲弟二首

雞肋集卷六目錄

欽定四庫全書

雞肋集卷六

宋 晁補之 撰

古詩

玉溪歸逢甥李相如汴中

蠻鄉俟天形畏蠱復憚暑夢甥來萬里竹響風動宇如
今真似夢相對別恨吐平生窘執轡白面力如虎誰令
斗指日江使墮漁罟桃僵李為仆遺珮滿江渚常憂抱
石死無復腳踏土邠知徼時願起廢遇明主曠調已遠

跡未用矜杜舉但憂世議隘亡弓不亡楚吾甥學孔子
況乃父母魯如聞四門闢未信遡洄沮上書閔魃旱膏
以神靈雨北海自有人高邱豈無女爾壯觀爾能吾歸
固吾所期甥二兒上餘子不足數何以喻吾心酌此湘
吳醕

送學生李公裕兄弟赴省集

閉門圍火談開戶雪一尺黃昏具盃酒知君遠行役君
家三兄弟頗謂各無敵容父學知方大道通四驛吉父

尤頡頏天池觀水擊仁父少而奇乃是夜光璧李侯有
此子便可臥安席家居樂與餌聊以止過客豈無一束
芻空谷不可食宵人操寵利徒手捕蜴蜥公等寧復然
烏黑鵠自白屠龍業有用未厭所從僻富貴念替時城
東雪中跡

次韻太學舒博士堯文示同志

北闕望瀛關一葦初莫渡

頃官大名堯文在高陽

儒宮連案几會

合豈非數蟬鳴幾何時庭菊下白露念當慰佳節觴酌

美無度不然坐歲晚流景急飛兔區區人一馬官舍勤
早算經時枉見贈彌月不能賦竹齋行茗粥寂莫當屢
赴此君安可得霜雪不改故詩如戰交地高處要先據
牛羹君放飢輟鼎吾亦飫顧慙詠伐檀無補餐已素還
家便却埽況乃無戶屨

次韻蘇翰林五日揚州石塔寺烹茶

唐來木蘭寺遺跡今未滅僧鐘嘲飢後語出飢客舌今
公食方丈玉茗攄噫噓當年臥江湖不泣逐臣袂中和

似此茗受水不易節輕塵散羅麴亂乳發甌雪佳辰雜
蘭艾共弔楚纍潔老謙三昧手心得非口訣誰知此間
妙我欲希超絕持誇淮北士湯餅供朝啜

題四弟以道橫軸畫

黃葉滿青山枯蒲靜寒水鳬雁下坡塍牛羊散墟里擔
穫算來歸兒迎婦窺籬虎頭無骨相田野有餘思

桂漿

暑臥午呀呬蠲煩何所投巖桂割辛芳石蜜滋甘柔沃

以火鼎沸閔之冰井幽三日出溪冪明瓊盎黃流冰火
離坎類意比秣麥繚辛甘既兩適不酒亦銷憂中年苦
內熱歲願西風秋寒涼犯所畏發散資爾謀時時以觴
客三獻不一酬緬思湘纍語啜醕終所羞北斗酌此漿
違世聊遠遊恐復迷吾往僕悲道阻脩淮南歸來些憊
慄令人愁百壺無此餞夙志慕林邱寧懷小山感不為
桂枝留

送舅氏楊通直令陽穀

人言慎縣宰頗似太邱君客戶有訓遣司官無訟聞外
家久寂莫舅氏少辛勤一邑何足道高名誰與羣西來
馬特特冬晚雪紛紛公朝道由砥孤士跡如雲過門苦
地僻下直迫日曛溪泥枉窮巷寒鑪對殘燭感慨說宣
子飄零綴遺文麟閣寔鉉魚山失耕芸遠情等匏繫
歸夢劇絲棼山東接畿甸陽穀近榆枌吏督猛豺虎民
如竄麋麋幸逢寬大時庶幾仁惠薰自笑下士策不殊
野人芹愛民宜百祿本茂實當貴

贈王推官允中

我生譬天星睨睨但空譽學經羞輪扁常恐老竄句南
游上會稽弱冠肆遠步便當期汗漫如鳥鵲脩羽入宮
又獨晚謠詠遭衆嫖坐令平生交室冷羶不具君公牆
東客清鑒美無度風期山水意千載見此遇定疑丹青
仙方我以癡顧豈繫才自疎閱世真異趣伐柯理無遠
要以一馬喻古人本不死方寸有佳處三年禹河曲日
見車馬渡何知謝剝啄黃土衣易汙無人尚有子獨載

城下路功名喧口實簪組託肺附請看耕畧滿取躋病
不去脫黏窺本初須子遺所寓怵迫倦東西林間尚寬
裕

之京師展墓

短轡馭羸馬馳驅曹濟間商飈折勁木蕭瑟道里寒況
復慕所天惻愴摧心肝游子歎時邁慈母憐衣單來時
憑窗哭五妹坐脩鬟季弟主菽粟孺妻爨茅管悼我無
令人莫奉堂上歡豈無萱草詩終日倚門闌念笱常獨

立所聞詩禮難我尚未成人遭罹此憂患歲晏念墳墓
仳離百哀攢何時奉靈車辛苦向此還親寡氣力微傍
人祝加餐願言薄志節苟生無形顏

同畢公叔飲城東

西城昔相值桃初雨三紅翩翩驚長陌春風搖馬鬃後
君歸幾日游絮已濛濛解鞍不待憩相命古原東芍藥
雖俗花狂姿幸時供平生於知己千過不一逢感君欲
開口清湊出霑胸君如陶淵明不為五斗恭胡為青綸

上朱墨紛外蒙棄官能從我短後追田翁銅斗釀秫麥
竹枝弋鳬鴻何必悲無衣縕黻聊御冬九辯太高潔五
噫苦羈窮置此無滑和天情反其中市藥非市名名聞
藥何庸十漿饋五漿猶畏聞者從如何酆城畔夜夜生
長虹

題李秀才成季負日軒

李自號
天隨子

盧敖遊八極末至北陰墟卒然蒙谷幽覩一奇丈夫淚
注而鵞肩淡目玄髭須軒軒迎風舞自得樂有餘見敖

默弗言慢然下臂趨教私躡其後若士意不愉曰子亦何為迷繆至此乎此雖窮荒北尚或逢日烏過是有玄關晦墨不可居語竟若欺魄攝身沒空虛始予讀秦記疑是忽帝徒今聆天隨言乃與夸父俱逐日下虞谷力窮尚嗟吁陽舒固物理我亦安于于若士獨何氣幽沈山海隅渾沌死已久人生信多塗

次韻李成季感事

吾廬無餘他文字散堆案雖微清溪鶴著畫亦幽玩高

人來何疎午榻動成鼾夢聞足音喜不待搔枕喚居貧
少煙火饘食尚須旰出門兀何之踉蹌從款段吾人古
遺隱鳬足閔同患負日持獻君狐白不肯換商歌叩牛
角長夜安得旦颼颼滿屋風黃葉散投幔楚屈若靈龜
出處思過半所從聊自知何用詹尹算不如天隨生頭
幘終日岸況君擊莊缶一念腸九轉人方臥大室子獨
號其畔寒山來助哭咄爾勿嗟惋

同李主簿叔文飲北莊

蕭條蓐收窮疎樹失穠紺北風動地起雲攬紅日暗李
君邀我游饋藪治寒檐相攜二三子歛若符節慙愧非
谷口隱佳會良可暫茅堂兀四壁誰識此意淡古徑無
俗尋陳編有幽瞰一聆君子語梁肉幾厭啗歸來馬河
北寂寞晚舟纜吾生事逃伏優游亦何憾

夏季

夏季百果繁兔葵亦成實獨有野石榴幽花時熠熠
熠非獨好芳榮賴午日翩翩彼白蜨髣髴粗采挹睡餘

起對此嘉興亦蕭瑟良非阡陌麗敢競陽春出無言以
成蹊上愧桃李質幸當飽霜餘萬顆富君室

曹州道中二首

天旱久不雨四郊多狂風蕭蕭班馬鳴落日大野中君
子守宮廷至樂聖所同喟予不逢辰足跡道里重

驅馬上高原秋風吹客衣感時有所懷送目鴻雁飛羸
僮惑岐道日暮相際稀愧彼倦翔鳥知還良庶幾

病起呈李縣令希孝

次公惡醒狂得酒要自濁病聞南隣邀不往亦踴躍空
床成展轉假寐風雨惡中虛氣襲逆妄夢時可愕每慙
張隱居凌旦發囊藥曉來天境清日出烏語樂家人語
南軒青杏已可嚼復云竹齋前堦有迸籜欣然欲舉
手紗帽未能著平生李夫子相得懷抱廓何當戒長鬚
夙駕慰寂莫杯杓恐不勝快語聊一噓

贈金堤劉承制景文

漆園說海若稷下談神州長劒堪倚天語大世莫酬少

狂豈其然及此日月流稍知畫足非萬事指顧休夫子
更高識未沫於前修樂流聊復駛得渚正須留蓋有幸
遇魯何能必為周徜徉下澤車驚駭入谷騶對酒尚青
眼吟詩將白頭山陰論往事陳迹詎能收

次韻四弟以道十二弟叔與法王唱和兼示无
斁弟二首

少時勇遊山說山喜動色中年謫南方廬阜得溪歷當
時不類謫忘腰帶之適怪人肝鬲異破賊喜折屐只今

竄林下織衣而畊食緬懷茲兩士吾宗氣相得吾春種
桃時子曉尋嵩日似聞黃面子為採烏頭出去年陟岱
宗一士世莫識天門邀之下傾倒意已極斯人與人異
龍虎兩超忽重尋亦無路顛雨石崖坼

吾人伯仲間一語可物色氣自寡所諧窮乃足所歷家
風貌五世不肯適人適意行無險易又跣不著屐文詞
如苦李慄腹人莫食猶矜不傳妙坐恐兒曹得學憐新
又新老奈日復日伯以最恬愉何由採之出无數能寡

言猶堪謝前識叔與氣尚豪
搢頤視屋極斯文惡表襮
枯魚戒所忽應如魯宮籀藏壁俟其圯

雞肋集卷六